

天玄無

隱真能

子子子



卷之三

卷之三

卷之三



玄

真

子

張志和 撰

中華書局

叢書集成初編所選子彙及知不足齋
叢書金華叢書皆收有此書子彙標題
曰玄真子外篇不分卷第子目曰碧虛
曰鸞鶴曰濤之靈知不足本即就此三
篇分爲上中下三卷唯多顏真卿所撰
張志和碑銘又卷末有盧召弓校識一
行云以藏本校蓋道藏也金華覆刊知
不足本故據知不足本影印

玄真子卷上

唐張志和撰

碧虛

碧虛冥茫飄輪斡乎乾湫盤浮乎坤紅明環於天衢升井爲炎降斗爲寒由是四時旋而萬物遷斯造化之亞矣然非造化之元哉

无涯者辯伯也涯之言曰黃郊之帝曰祇卑紫微之帝曰神尊碧虛之帝曰靈荒祇卑王於地山河草木屬焉神尊王於天日月星漢屬焉靈

荒王於空風雷雲雨屬焉碧虛和平二帝有方
春之會俄而祇卑上騰神尊下降遇於靈荒之
野靈荒之帝虛位郊迎傾國所有積肉成霞散
酒成雨電走雷奔風歌雲舞累月爲中道主上
下无怨二帝欣然愧靈荒之厚德令碧虛之不安
爭讓國以延靈荒之帝神尊曰朕有天祇卑
曰朕有地靈荒怪天地之名問之曰朕之仰觀
不異碧虛朕之俯察不異碧虛碧虛之中其又
奚物帝言天地厥狀若何祇卑曰朕之地體大

質厚資生元元中高外垂其勢坤層然如壇轡
物尊圍八極海環九山骨巖石毛草木肉土而
脈泉汗露而氣煙江河川瀆亂奔流人蟲鳥獸
紛往還願帝之下而游焉神尊曰朕之天體虛
形高資始化化中員外轉其行乾穹然如帳幙
物尊五星交列宿粲邊層輪日月中文帶河漢
絕霧祲雲霞列仙天宮殿願帝之上而居焉靈
荒未之信曰天如帳胡縣乎其上地如壇厥下
乎何安神尊曰天之帳非上縣飄輪下載常左

旋三光隨之以西遷祇卑曰地之壇有湫盤凝
浮其上所以安靈荒曰飄輪斡靈生湫盤奚物
盛願聞之祇卑曰飄輪徧乎下湫盤所以停帝
何疑靈荒曰噫天地之形造化信然實如所論
固當息焉朕之空茫唐濛同无不通无内无外
无西无東曠闊漭蕩蒼茫青冥含日月之光震
雷霆之聲挂虹霓之色飛龍鸞之形朕坐而游
之臥而汎之泛然飄颻喈可停豁乎包乎母廓
乎堅乎壽非春夏之能生非歲年之能朽先天

地不見其初後天地不知其久若然者安能棄
朕之長無寄君之暫有哉於是二帝謝靈荒之
言退還故府祇卑降黃郊神尊升紫微數月不
泰然天地爲之閉

紅霞子問乎碧虛子曰夫造化之端自然之元
其體若何霄願游夫子之域而觀之豈得聞邪
於是碧虛子次然有閒豁然情容而曉顏詠乎
太寥之上爲空洞之歌謂之曰无自而然自然
之元无造而化造化之端廓然慤然其形圃闔

爾之視絕爾之思可以觀紅霞子曰若霄者儻
遨而忽游請駕乎言霄願乘之以逍遙不暇辭
夫子而觀焉於是碧虛子導之曰无自而是謂
元然无造而化是謂真化之元也之真也无元
而元是謂真元无真而真是謂元真馳言曰
无然乎其然一乎然後觀乎自然无化乎其化
一乎化然後觀乎造化无元乎其元一乎元
然後觀乎真元无真乎其真一乎真然後觀乎元
真逸言曰真真乎元元乎真元乎无真乎真

真真乎无元乎元元然後登太寥之天夫无有
也者有无之始也有无也者无有之初也无有
作有无立而造化行乎其中矣夫造化之興也
空以徧之風以行之水以聚之識以感之氣以
通之而萬物備乎其中矣空徧而體存風行而
用作水聚而有見識感而念生氣通而意立體
存故可以厚本用作故可以明漸有見故可以
觀變念生故可以知化意立故可以詳理是知
本可厚者空之體也漸可明者風之用也變可

觀者水之有也化可知者識之念也理可詳者氣之意也是故風水競變物其物而不同識氣多端意其意而不一幹乎乾而能常浮乎坤而能長運之而無窮生之而無方化之而無邊因之而無疆原其原者夫何謂歟造而化之存乎太初太而極之存乎無自而然之存乎虛無而住之存乎妙觀其所存而造化之元可見矣

紅霞子明乎造化之域患乎屢空之色於是披紅明之衣戴朱光之冠服賴游之履東赤聯之

帶驂火虬之蜿蜒鼓紫鸞之綺紵轉渥丹之雙

轂執染絳之六轡諷日卜時戒途祖道

道藏本云紅霞

子明乎造化之域患乎屢空之色於是披紅陽之光餐碧寥之氣以實其容絕慶弔之禮寡親朋之間獨與太虛游往來高會僕風應門燭月繼夜而寂談不輟味俗享貴者聞之造焉覩其

空巷荒廬色不勝憂心爲之恥謂之曰我躬不閱遑恤造化紅霞子曰吾爲造化知己固有弗

詳而造化獨不吾知致有所乏吾无慚於造化造化有愧於吾吾將往而詬之以慰君之憂澣君之恥於是駕紅陽之騎乘碧寥之輿拂衣東轍○以下與此本同語明水之霽

虹與貫天之緋霓曰造而化者非眞化化而造者非元造元元眞眞爲造化根造化何勲於碧

虛碧虛何有於造化而獨擅主宰之名非彼貪功爲已卽此假僞爲眞吾將詬之虛冥以觀其名名之情四游隔越六虛迷冥於是東轍經諸无之界遇同空將假道焉同空曰子何爲者而居於斯曰吾紅霞子也吾將詬諸造化願假道於君同空問之曰孰爲造化奚謂假道紅霞子曰爲物之主宰曰造化藉君之國行曰假道同空曰若然者朕之東無化可造朕之國无道可假君其改途紅霞子於是拂衣南馳經自然之

域遇化元將假道焉化元曰子何爲者而居乎斯曰吾紅霞子也吾將詬諸造化願假道於君化元詰之曰夫造化朕之兄弟之國也子弗聞乎假朕之道詬朕之親朕之仇也師徒將攻之紅霞子於是拂衣西驅經无住之邦遇因本將假道焉因本曰子爲何者而居乎斯曰吾紅霞子也吾將詬諸造化願假道於君因本拒之曰假道之資子弗聞乎子有飛空之乘與照虛之璧吾將爲子啓關紅霞子曰使吾有碧乘之資

尚弗詬諸造化無假道於君哉於是乎拂衣而北趨經太極之野遇生首將假道焉生首曰子何爲者而屆乎斯曰吾紅霞子也吾將詬諸造化願假道於君生首訶之曰子何知之晚也夫造化之夐可知而不可鄰可聞而不可親雖欲假子之道其何以至子將詬之無乃不可乎於是紅霞子聞生首之訶兀焉喪有徘徊躊躇還轡旋輿經元原之郊迷失途於牧道童子神與易浴乎元川而遨於是問津焉二童曰夫子奚

氏也跋涉虛無蒙犯煙霄車馬有浮空之倦何
之而問乎津紅霞子曰吾紅霞子也吾嘗知造
化而造化弗吾知使吾乏資身之用爲味俗之
恥吾將詎諸造化吾適東轍西驅南馳北趨而
假道於四方東至於諸無南至於自然西至於
无住北至於太極四之皆不遇諸无有同空之
問无住有因本之拒太極有生首之訶自然有
化元之詰吾念日暮途遠旋吾之輿歸乎寰中
於斯逃津幸哉而遇子敢欲問焉然子爲誰也